

湖海樓詞集

冊四

湖海樓詞集卷二十四

宜興陳維崧其年著

選

第 維岳緯雲 參閱

宗石子萬

男履端

校

姪賜薛

疎影

憶鄧尉梅花

佳人空谷有銅坑千樹瀟湘一幅暗記當年纔過收
燈有人約探林屋參差帽影鞭絲裏餽釘得許多濃
綠便歸來攜取冰魂併入小窗橫竹詎料今年病
裏東君又過去九分之六冷落看花情性懣騰且把
道書閒讀不緣修道緣伊冷恐辜負樓東瘦玉忍餘
寒夢到深山細問一春幽獨

咏瓶中蠟梅

簾紅瓷翠襯蜜犀花朵色凝髹几入道梅妃新換黃
絀賽他林下風致分得壽陽粧額上漸啄破小鵝兒

嘴愛生成金屋故園長憶飄零娣姒側正端相都好儘經營位置費盡纖指生怕冷香易瀉侍兒頻汲銅溝清泚十分春意三分漏猜不出蠟丸中字囑檀奴守口如瓶莫把鸞絨漫啓

咏虞山毛氏汲古閣兼贈斧季

絳雲燼後有隱湖小閣突兀晴晝錦襜團窠箋剔泥金珊瑚石尉休鬪墨花蝕處香偏冽論官焙何須荳蔻記開雕北宋南唐漢碣秦碑同壽寒具慎教輕觸牙籤除付與蕙玉纖手灩灩油窗的的春繁靜對瓶花句讀縹囊便是劉伶鍾縱萬戶千鍾何有任誇他帝子臨春此閣更饒妍秀

獨坐祖園聞顧庵葯園亦在吳門未及一晤

詞以寄懷

軒如畫舸載笛床茗椀終朝閒臥鬪酒生涯挑筍年光恰值濃春剛過菖蒲牋好慵吟寫說不盡心情難妥似綠窗一種嬌憨懶對盤龍梳裏聞說瀨中老輩丁儀共曹植也客江左小甕鵝黃小袖雲藍笑口

思量同破空園寂寂誰傳信且悶倚赤闌橋坐正水
邊颺起微風滿院繡球花墮

暮春新霽

流鶯無賴將一天霽景啼碎窗外雨後帝青橋上衫
紅盈盈定有人在趁晴蛺蝶漫空舞立不穩泥金裙
帶水如塵玉剪輕飛莫點葡萄痕壞 幾日心情小
極爲粘花中酒暗鎖眉黛蹙了顰紉閣了鈿車誰愛
鬪茶挑菜帽簷故傍鞦韆側恰今日風光如海便春
晴人意誰收已報棟花風大

黃梅

霜天殘臘綻細梅滿樹半開微合嬾鬪春園小白長
紅只愛新興蜜蠟鬱金堂外模糊見貪耍學厭襌粧
法惹綠窗鎮日昏黃錯認薰香睡鴨 曾有箇人雲
鬢摘盈盈半朵和笑低插戲罵花枝何物檀奴也上
香蟬斜壓如今人去花何用索性把花枝齊招攬斜
陽別樣心情且喚澆愁蠻榼

風流子

除夕幾士大兄以新曆燭炬餉我賦此奉酬
因懷亡弟半雪并寄三弟緯雲於都下四
弟子萬於宋中

白頭兄弟在將進酒且賦小秦王歎世上鷄蟲笑人
寂寂天邊蜍兔去我堂堂誰相寄一編書是鳳千炬
蠟成凰檢處從頭時乎已暮燒時見跋夜也何長
可憐惟一鴈東風催散去永不成行迴想去冬今夜
人正顛狂算年去年來楓根少曆春陰春雨燐火無
光知爾天涯二季一樣沾裳

感舊

幾摺枕屏斜凝眸看蕃馬簇平沙算故國樓臺許多
風物當年歌管何限韶華曾記得和烟羅幌展映水
粉牆遮乍雨乍晴賣錫天氣半癡半點鬪酒生涯
也知別來事渾嬌嬾難勝蟬翼輕紗多管逢春不語
對月長嗟只芳草粘天聲聲杜宇畫簾垂地陣陣楊
花贏得無聊小樓數盡栖鴉

南徐春暮程崑崙別駕招飲南郊外園亭同

方爾止孫豹人談長益鄒程邨何雍南程
千一賦

來時寒食近且近耳詎料竟殘春正僕本多愁何妨
作達官如不醉遮莫傷神見此際酒旗斜喚客榆葉
弱縈人燕子風前是何言語柳條烟裏別樣腰身
名園行樂處追歡笑何限寶馬香輪况遇風流刺史
瀟灑遺民奈東望蔣州春潮拍拍北來瓜渚暮雨紛
紛還怕當歌對酒忽又沾巾

錫山慶雲庵感舊時永如上人新逝

衆山排峭壁西風吼亂葉打茆庵記竹外時逢拈花
迦葉水邊曾值洗鉢瞿曇依稀是鳥啼幽澗北僧送
石橋南萬壑松飈王裴名理半床蘿月支許清談
重經春來地人誰在祇見霜信初酣染就千圍楓櫬
一路杉栂數電光石火佛猶如此山丘華屋人則何
堪隱隱前林暝翠暗結精藍

月夜感憶

冰蟾飛皓彩今宵月勝似昨宵圓有一片角聲淒清

枕畔三秋桂子零亂樽前人生事千齡渾似夢百計
且求仙鳳舞鸞歌別來幾日瓊樓玉宇歸去何年
流霞須傾盡金荷裏鯨飲併吸嬋娟遙憶庾樓今夜
多少英賢想月明千里戰袍不夜西風萬馬殺氣臨
邊我控雲中黃鵠一笑茫然

泊舟譙郡贈新安汪公言

桃花潭上水深千尺不抵似汪倫正留客西園紅燈
翠幙送余南浦淡月微雲依稀記賞花敲畫鼓紉酒
喚羅裙贈到歲終休教鎖恨貽來螺墨莫便磨人時
公言有青瑣名墨之贈 南譙繁華地重經過一片
野渡斜曛剩下紅橋舊巷黃葉前村想千年李樹仙
游已邈三分吉利霸業俱陳 老子曹瞞俱亳邑人且
自佯狂作達何事消魂

董樗亭來始見錢莼斂寄我新詞而莼斂之
墓已有宿草矣愴懷我友漬淚成詞卽用
莼斂來韻并求竹垞朱十亦一繼作

故人新化鶴今宵月含淚盼瑤京念別我西園朱曦

翦翹送君南浦雪浪掀騰誰曾料人間瓊樹折天上
玉樓成湘瑟纔彈便驚絕調粉箋剛到遽隔前生
新詞沉吟徧斜行字銀鈎蠶尾縱橫留向愁中細閱
醉後閒評悵一帶新蒲碧淒杜甫千門御柳綠怨韓
翺不待隣家笛起早悔浮名

大聖樂

甲寅清明

糝雪梅嬌弄烟杏煥嫩楊初絲正賣錫聲近簾櫳店
舍恰逢百五風颭斜旗綠波畫橋門暗鎖聽牆裏誰
家笑語微知他定是鞦韆纔下慵換春衣芳郊也
擬讌賞奈舊日心情半已非只一園蝴蝶滿地燕子
亂撲晴暉墓左麒麟枝頭杜宇不飲芳樽更待誰梨
花底照明粧淡粉上塚人歸

高山流水

卽席別吳門諸子偕園次返梁溪并呈伯成
先生

西風落拓闔閭城有留農白恰紅箏細雨落簷花吳

王宮外鷄鳴屏當好嫩橘鮮橙甌如雪真珠藥玉齊
傾三兩狂夫趁箏琶未歇促拍調俱成 閒評相逢
作達耳人世事落絮浮萍楓橋下幾船夜火一派寒
更奈酒醒人又趲離程早潮平報道山泉待我涼夢
先縈儘殘年漁蓑茶竈寄浮生

江南春

本意和倪雲林原韻

風光三月連櫻笋美人躊躇白日靜小屏空翠颭東
風不見其餘見衫影無端料峭春暝冷忽憶青驄別
鄉井長將妾淚點紅巾願作征夫車畔塵 人歸遲
春去急雨絲滿院流光濕錦書道遠嗟奚及坐守吳
山一春碧何日功成還馬邑雙倚枇杷花樹立夕陽
飛絮化爲萍攬之不得徒營營

霜葉飛

夜雨感舊東史雲臣

西風鴈壓涼雲破攢成暝色如許屏風幾疊擁瀟湘
正晚山碧聚擬偷按淒涼宮譜小樓寒峭移箏柱奈

偏到此時添幾陣蕭蕭浙浙長夜難住 對此倍悵
無慘銀燈細炙猶自顧影私語一從西北倦游歸只
髻催霜縷總夢到咸陽原去也應紅盡驪山樹算前
情都付與一片青砧三通畫鼓

黃芽菜

輕鬆纖軟評春雪此言殊耐尋玩昔人句子巧形相
又入春趺贊細擬議兩般俱善不如單咏霜蔬便每
未到春盤早賴甲嬌擎雋永那數禁臠 此際風雪
豪家點酥抑鮓花壓羔兒紅淺寒酸腹內賸蔬畦那
有羊來踐只千里湖蓴路遠鄉愁菜把權消遣對稀
疎憑小摘忽憶情親躊躇未免山谷詩云庾郎畦菜
二十七太常齋日三百餘上丁分膳一飽飯藏神夢
訴羊蹴蔬小摘爲情親杜詩也

過秦樓

松陵城外經疎香閣故址感賦 閣係才媛葉

瓊章讀書處

烏啄雙環蝶粘交網此是阿誰門第墊巾繞柱背手

循廊直恁冷清清地想爲草沒空園總到春歸也無人至只櫻桃一樹有時和雨暗垂紅淚料昔日人在小樓窗兒簾子定比今番不似望殘屋角立盡街心何處玉釵聲膩惟有門前遠山還學當年眉峯空翠憶香詞尚在吟向東風斜倚

五綵結同心

過惠山蔣氏酒樓感舊余去年與雲郎曾宿此樓

惠山山下誰氏高樓記曾借我酣眠夜半喧山雨龍峯頂飛挂百幅簾泉當時尚有玲瓏在憑闌唱落葉哀蟬可惜是聲聲紅豆憶來大半難全如今重經樓下只水聲幽咽髣髴鳴絃彈指匆匆舊時燕子換做萬里啼鵲當壚莫喚樓前客應怪我淚裏紅綿惆悵煞一天明月滿汀漁火商船

乙卯冬杪與園次飲惠山蔣氏酒樓翠袖紅絃談諧甚劇酒半忽遇廣陵高生至記與山陰友人紅橋狎讌時匆匆已十三年矣

故人萬里昔夢千端不勝白髮玲瓏之感
詞以寄慨

簾風暗裊檻雪新晴小樓月又剛圓有杜秋娘在微
酣候催弄脆竹零絃曲中驀聽羊車到褰幃入一座
喧闐驚疑甚似曾相識別來一十三年 重新移燈
添酒算夜長難睡且話從前記得當初揚州薄倖有
人同做樊川玲瓏去後詩人老湖湘客飄泊誰憐憑
誰報渡瀘諸葛君家燕子依然

賀馮躬暨納姬

隔街爭唱相府蓮開覆額香蟬初裹紅漆車兒穩綉
簾動壓角紅珠駛駢只愁阮婦剛纔嫁飄吳語綠窗
邊過怕難免粉防脂邏安頓最宜詳妥 連晨書樓
長鎖料也應推說棟花風大千騎今年事雙雙去笑
上丹駟翠舸郎君佳話人傳徧怪底事端然瞞我倘
相逢春宵筵上百罰深杯方可

女冠子 第四體

詠美人坐禪和彭羨門原韻

蕭蕭禪榻百和旃檀薰透花冠啼罷烏龍睡熟紫竹
清幽黃帔瘦小袒緋羅袖雙疊湘裙紅吐花邊一綰
最憐他趺坐桃笙一派秋江綠皺 靈山參破風幡
後奈十年前事終向心頭有佳人不偶記惜玉情懷
竊香時候迦文消夙垢正值鐘聲報午苔陰移晷問
籠中白雪衣娘一卷名經完否

癸丑元夕用宋蔣竹山韻

上元晴也盈盈霽景堪畫夾城况有瓊苞千斛翠巖
雙奩冷輝交射一輪圓玉掛越顯人間天上十分良
夜想誰家年少此際正逐暗塵嬉耍 六街春謎慵
猜打數浮生故國難把前歡借蠟珠紅炮總濕透昔
日傳柑雙帕春羅愁細研也料寫他不盡十年前話
約東風選夢惹人重到舊樊樓下

小梅花

感事括古語倣賀東山體

君莫喜羊叔子何如銅雀臺前伎拍檀槽橫寶刀屠
門大嚼亦足以自豪人生有情淚沾臆雖壽松喬竟

何益捋黃鬚眺五湖如此江山應出孫伯符 傷心
史可憐子卿復何爲爾大江東一帆風來往行人閒
坐說玄宗連昌宮中滿宮竹白項老烏啼上屋穆提
婆蕭摩訶且自吾爲楚舞若楚歌

咸陽樹驪山路可憐當日作事悞殷仲文王衛軍國
家此輩要是可惜人憶君清淚如鉛水奴見大家心
亦死令壺齟收中吾聊且酒酣耳熱歌嗚嗚 莫櫟
釜行學估羞與噲等伍金屈卮楊叛兒阿奴今日不
減向子期生子當如李亞子奴價今年大勝婢穀朱
丹作高官未若小樓吹徹玉笙寒

蘇武慢

汴城晚眺

暮色傷心重關極目潏潏黃河之水侯羸館老朱亥
坐高直得英雄心死城頭戍火馬上征笳何苦愁人
如是最堪憐千里蒯緱牢落方當盛齒 細數他趙
宋繁華宣和節物此事幾多年矣宜春燈燭延福笙
簫多少六街三市有恨秋槐無情社燕換過幾番人

世只空留廣武漿陽一片驚濤剩壘

送孫郎賈汝寧無言令嗣

胃脯擊鐘馬醫連騎間者吾聞之矣神仙無路將相
難爲只有鬻財可耳解人吾子健者孫郎遂作急裝
而起看翩然袂服鳴鞭矯若奔泉渴驥 又何須西
賈巴巫南游滇楚動足下床萬里天中上郡汝水雄
關儘可持籌列肆鮑革千箱貂褸百襲傲殺毛錐之
子只倡樓莫擁如花速辦腰纏歸計

梁溪舟中對雪

森森蕭林迢迢凍浦颯沓亂帆成陣忽飛駛雪暗灑
吳裝極目空明相混孤墩殘角小寺疎鐘今夜吟情
難穩望前村水店溪橋風裏青旗斜趁 也思量一
盞禪燈半衾煖玉長守南山故隱詎期屢歲每到年
時諳足旅愁羈恨綉陌神讎紅箋致語一載又還將
盡小樓前幾樹橫枝想已漸堆香粉

惜餘春慢

梁園春同侯仲衡叔岱徐恭士田梁紫弟子

萬看牡丹作

節過前裙人稀拋墻又是一番初夏春歸下浣客到
中原隴首濃陰誰畫多少濛濛柳綿和了春陰苑人
簾下正曉來忽聽園丁報道牡丹開也相攜去闕
伯臺前孝王園後小試玉驄寶馬梅風幾陣鶯語多
般引出紫嬌紅姹歌板欄邊競開密幄圍花娛他清
夜撚一枝忽憶沉香且作開元閒話

立夏前一日竹逸招同雲臣脩承紅友天石
惠文補仲雲濤放庵二上人賞紫牡丹用
宋魯逸仲原韻

飛絮年光脫綿時節綠徧裙腰芳草雒陽貴籍紫府
真妃臉暈露華春曉記得年前種時一朵嬌柔問年
猶小自畫堂養就芳姿漸長閒愁不少驀聽得杜
宇催歸濃春將謝先自替花煩惱排當檀板料理金
樽花徑夜來頻掃追想開元舊游玉笛寧王琵琶賀
老只日斜客散散滿欄姹紫剩游蜂遶

玉山枕

咏白鸚鵡

小院清麗蜻蜓翼空如水楊花門戶梨花院落風漾
金籠蹁躑不止雪衣簷畔誦迦文恰生小怕施朱翠
有玉奴夢醒無慘然瓊枝向月中調戲尉佗臺上
當年事心兒內重提起拋家離井好風良夜腸斷三
年魂消萬里從來薄命玉容人也只是飄零如此倩
銀鴻問訊珠娘素馨花想此時開矣白鸚鵡來自嶺南故云

秋夜較讐亡友史遠公青堂詞卷竟淒然綴此

山館烟舍記汗漫同杯學飛騰峭壁攀援絕澗亂水
奔渾暮雲狼藉夜深健句怒盤空看筆底崖崩濤瀉
更興酣蟻視羣兒擲琵琶踞酒壚而罵如今往事
隨飄瓦經幾陣寒潮打燈昏拍促更闌絃急月魄難
圓蓮衣易謝淚和鉛水汎鶻紅都點上殘縑剩怕落
梧聲似伴吟魂隔西窗作秋宵閒話

宣清